



Selasa, 30 Mei 2023
Ogen: Lukas 21:1-4



Mere Tapi La Kekurangan



Tidak ada yang menjadi miskin dengan memberi. Enda sada kata motivasi si ngajuk kerina manusia nggit mere, erbagi kai si lit i bassa. Ngkai? Erkiteken la seri kerina kecibal geluh, la seri kesempatan si reh man teptep kalak dengen nterem kalak si merluken penampat i bas kita nari. Banci ikataken, mere e pe jadi kesempatan man banta lako ncidahken keleng ate. Kesempatan guna mbuka dalam man kalak sideban i bas mpehuliken kegeluhenna. Mere enda mbelin kawitenna ras biak manusia. Sabap labo kerina kalak mere i bas kelebihanenna tapi banci i bas kekurangenna nari pe nggit ia mere erkiteken biakna kin melumbar. Sabap lit nge kalak si mbue buatenna lit tapi erkiteken biakna labo melumbar, ia jadi kalak si mediker, pelit. Sabap ndauh kal bedana biak kalak si melumbar ras mediker enda.

Renungenta sendah nuriken kerna sekalak diberu balu-balu nehken persembahenna, mata uang sikitikna si ibabana ku Rumah Pertoton. Tapi si jadi e jadi perhatin Jesus janah ijadikenna gambaren kalak nehken persembahen. Amin kitik isehkenna tapi belinen kepe i bas Jesus asangken kalak si nehken persembahen melala. Sabap ia mere i bas kekurangan, ibandingeken kalak mere arah kelebihanenna. Tentuna perbahanen diberu balu-balu enda erpalasken kiniteken si mbelin man Dibata.

Perbahanen enda ngajuk kerina kita guna mpebelin biak melumbar mere. Sabap labo lit kalak jatuh miskin erkiteken nggit mere, subuk i bas nampati, erbahan perbahanen si mehuli bagepe i bas maba persembahen. Pengangkan kerna si lit i bas kita e kerina pasu-pasu Dibata nge maka turah perukuren nggit mere alu dem keriahen ukur. Seh labo ngukuri untung rugi tapi keriahen ras kesangapen i bas ngasup erbagi.